


夢林玄解

字集  
夢論

一之元



|     |   |   |   |
|-----|---|---|---|
| 漢書門 |   |   |   |
| 九   | 六 | 六 | 三 |
| 三   | 二 | 三 | 三 |
| 一   | 〇 | 六 | 三 |
| 冊   | 架 | 函 | 號 |

|      |   |   |   |
|------|---|---|---|
| 庫文閣內 |   |   |   |
| 三    | 〇 | 六 | 三 |
| 〇    | 六 | 六 | 三 |
| 一    | 〇 | 六 | 三 |
| 架    | 冊 | 號 | 類 |

|      |     |       |
|------|-----|-------|
| 內閣文庫 |     |       |
| 番號   | 漢   | 9663  |
| 冊數   | 10  | ( 2 ) |
| 函號   | 306 | 10    |



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





夢論引

淺草文庫

甲戌之歲。固鄉子極何公  
出家。藏夢林玄解一書。  
屬不。依訂叅刪補焉。且  
益。茲所貯卷帙。夏購海



內遺編以揆曰書止一占今  
室附以襍辟之說蓋贈惡  
獻吉昉乎周禮非荒誕也  
不佞唯之迺蚤夜簡閱一  
本養吾之舊與駿明氏所集

悉心考較次其編目芟其  
蕪紊裨其缺略不敢謬  
附已見而亦非復曩書  
之殘蟲以矣凡兩經霜汗  
揖成曰靜念夢勾之語倡



自釋典其實上古聖賢如  
風后力牧伊尹傳說之傳  
明良相際每得諸夢寐  
且孔子至聖也其不為迂  
妄人所共信而亦以周公不

夢卜吾道之興衰尚可謂夢  
苟也邪乃洵人之疾夢的  
有成說夢之所形應有成  
驗然則不遯所繇來不稽  
之已往猶未成其書之全耳



爰據凌虛張子所輯夢占  
 類考而推廣之兩分之二  
 曰夢論稽往指也一曰夢  
 原溯繇來也使天下信其  
 占而又有以除其不祥明

其說而更有以券其不証罔  
 俾見而喜曰庶幾哉可以補  
 寓內載籍所未備雖長柳輝  
 徑之全當不遇是矣遂漫  
 筆識此時崇祿丙子冬也



紫水山人黃奎書于多漚



夢林玄解論集卷之一目錄

夢論

黃帝素問

刺病善  
夢論

黃帝素問

氣厥妄  
夢論

靈樞經

邪淫喜  
夢論

周禮

掌三夢  
之法論

周禮

贊三夢  
之占論

周禮

占六夢之  
吉凶論

周書泰誓

夢十襲  
休論

毛詩小雅

乃占吉  
夢論

毛詩小雅

訊之占  
夢論

孔氏

凡夢不必  
占官論

莊子

夢中占  
夢論

莊子

夢覺  
論

秦越人

老少寐  
寤論

列子

夢有六  
候論

列子

神凝夢  
消論

列子

真人不  
夢論



荀子 心臥則夢論

淮南子 合道不夢論

說苑 夢通天地夢警士大夫論

孔穎達 聖人焉得無夢論

史記 周王夢遂事論

漢書藝文志七略 衆占夢爲大論

衛樂 剖析想因夢論

論衡 龜夢同占論

論衡 直夢象類論

殷浩 夢尸夢穢論

王叔和脉經 夢論

蕭方等 夢魚化鳥論

白居易 飢渴致夢論

六書精蘊 夢想邪漫論

程子 夢寢是理論

朱子 所爲所夢各以類應論

朱子 寤寐感通論

王魯直 病因窮達夢論

呂東萊 夢以類至論

呂東萊 夢寐未必盡絲想因所致論

輔廣 占夢謹人天之際論

王晦叔 立官以察夢寐妖祥論

王潛夫 夢列篇論

餘冬序錄 圓夢論

倫道全 今人說夢論

夢覺子 皆夢軒說

鏡玉子 夢覺解

高陽生 五臟虛實發夢歌

夢林玄解論集卷之一目錄







水中若有畏恐肝氣虛則夢見菌香生草得其時則夢伏樹下不敢起心氣虛則夢救火陽物得其時則夢燔灼脾氣虛則夢飲食不足得其時則夢築垣蓋屋此皆五臟氣虛陽氣有餘陰氣不足合之五診調之陰陽以在經脈

○ ○ 靈樞經邪淫喜夢論

黃帝曰願聞淫邪泮衍奈何岐伯曰正邪從外襲內而未  
有定舍反淫於藏不得定處與榮衛俱行而與魂魄飛揚  
使人臥不得安而喜夢氣淫於府則有餘於外不足於內  
氣淫於藏則有餘於內不足於外故陰氣盛則夢涉大水  
而恐懼陽氣盛則夢大火而燔灼陰陽俱盛則夢相殺上

盛則夢飛下盛則夢墜甚饑則夢取甚飽則夢予肝氣盛  
則夢怒肺氣盛則夢恐懼哭泣飛揚心氣盛則夢喜笑恐  
畏脾氣盛則夢歌樂身體重不舉腎氣盛則夢腰脊兩解  
不屬凡此十二盛者至而寫之立已厥氣客於心則夢見  
丘山煙火客於肺則夢飛揚見金鐵之奇物客於肝則夢  
山林樹木客於脾則夢見丘陵大澤壞屋風雨客於腎則  
夢臨淵沒居水中客於膀胱則夢遊行客於胃則夢飲食  
客於大腸則夢田野客於小腸則夢聚邑衝衢客於膽則  
夢鬪訟自刳客於陰器則夢接內客於項則夢斬首客於  
脛則夢行走而不能前及居深地茆苑中客於股肱則夢



禮節拜起客於胞臚則夢洩便凡此十五不足者至而補之立巳也。

○周禮掌三夢之法論

大卜掌三兆之法一玉兆二瓦兆三原兆掌三易之法一連山二歸藏三周易掌三夢之法一曰致夢二曰觴夢三曰咸陟其經運十其別九十。

占夢以歲時日月星辰為運夢之吉凶。每運九變故其別九十其術今亡矣。

○周禮贊三夢之占論

以邦事作八命一曰征二曰象三曰與四曰謀五曰果六曰至七曰雨八曰瘳以八命贊三兆三易三夢之占以觀

國家之吉凶以詔救政。

○周禮占六夢之吉凶論

占夢掌其歲時觀天地之會辨陰陽之氣以日月星辰占六夢之吉凶一曰正夢二曰噩夢三曰思夢四曰寤夢五曰喜夢六曰懼夢季冬聘王夢獻吉夢於王王拜而受之乃舍萌於四方以贈惡夢遂令始難毆疫眠禳掌十輝之法以觀妖祥辨吉凶一曰禳二曰象三曰鑄四曰監五曰闇六曰曹七曰彌八曰叙九曰濟十曰想。

日者王象夜有夢則晝視日旁之氣以占其吉凶故曰輝輝者日光氣也每輝九變。

○周書泰誓夢卜襲休論



武王誓師曰朕夢協朕卜襲于休祥。

○○毛詩小雅斯干乃占吉夢論

乃寢乃興乃占我夢吉夢維何維熊維羆維虺維蛇大人

占之維熊維羆男子之祥維虺維蛇女子之祥。

○○毛詩小雅正月訊之占夢論

召彼故老訊之占夢。

○○孔氏凡夢不必占官論

凡夢吉凶不必占夢之官乃得占也左傳文公有夢子犯占之其類甚多

○○莊子夢中占夢論

夢飲酒者旦而哭泣夢哭泣者旦而田獵方其夢也不知其夢也夢之中又占其夢焉覺而後知其為夢也且有覺而後知此其大夢也而愚者自以為覺竊竊然智之君乎牧固哉丘與汝皆夢也子謂汝夢亦夢也是其言也其名為弔詭汝夢為鳥而厲乎天夢為魚而沒於淵不識今之意者其覺者耶其夢者耶

○○莊子寐覺論

其寐也魂交其覺也形開

○○秦越人老少寐寤不同論

難經二十六難曰老人臥而不寐老人眠臥而不能成寐也少壯寐而



不寤者少壯熟睡徹夜不能覺寤何也然經言少壯者血氣盛肌肉滑氣道通榮衛之行不失於常故晝日精夜不寤老人血氣衰肌肉不滑榮衛之道澹故晝日不能精夜不寐也故知老人不得寐也

靈樞曰五十已上為老二十已上為壯十八已上為少盛旺也常常度也陽主晝陰主夜陽動陰靜動主精靜主寐人一日一夜脉行五十度周於身榮衛晝日行陽二十五度夜行陰亦二十五度少壯之人榮衛盛肌肉滑血氣道路疏通不失常度平旦陰靜陽氣出於日則清爽而強日入陽盡而陰受氣則寐而不寤老人反是

○○列子夢有六候論

夢有六候一曰正夢二曰噩夢三曰思夢四曰寤夢五曰

喜夢六曰懼夢此六者神所交也故陰氣壯則夢涉大水而恐懼陽氣壯則夢涉大火而燔灼陰陽俱壯則夢相殺甚飽則夢子甚飢則夢取是以虛浮為疾者則夢揚以沉實為疾者則夢溺藉帶而寢則夢蛇飛鳥銜髮則夢飛將陰夢火將疾夢食夢飲酒者憂夢歌舞者哭

○○列子神凝夢消論

神遇為夢形接為事故晝想夜夢神形所遇故神凝者想夢自消

○○列子真人不夢論

信覺不語信夢不達物化之往來者也古之真人其覺日



忘其寢不夢。欲辨覺夢。惟黃帝與孔丘。今無黃帝孔丘孰辨之哉。

○荀子心臥則夢論

心臥則夢。故心未嘗動也。然而有所謂靜者。不以夢劇亂之。故謂之靜。

○淮南子合道不夢論

所謂真人者。性合於道。其寢不夢。其智不萌。其魄不拂。其魂不騰。

○說苑夢通天地夢警士夫論

心應棗。肝應榆。我通天地。將陰夢水。將晴夢火。天地通我。

好孽者。天之所以警天子諸侯也。惡夢者。天之所以警大夫也。故妖孽不勝善政。惡夢不勝善行。

○孔穎達聖人焉得無夢論

檀弓記孔子夢奠兩楹。聖人五情同乎人也。焉得無夢。

○史記周王夢遂事論

維正月。王在成周。昧爽。召三公左史戎夫曰。今夕朕夢遂事。寤驚。予乃驚。遂事之要戒。俾戎夫言之。朔望以聞。

○漢書藝文志七略衆占非一而夢爲大論

藝文志七略。禘古十八家。以黃帝長柳占夢十一卷。甘德長柳占夢二十卷爲首。其說曰。禘占家。紀百家之象。候善。



惡之證。衆占非一。而夢為大。故周有其官。周禮大卜掌三夢之法。一曰致夢。二曰觴夢。三曰咸陟。鄭氏以為致夢。夏后氏所作。觴夢。商人所作。咸陟者。言夢之得。周人取焉。而占夢專為一官。以日月星辰。占六夢之吉凶。其別曰正。曰噩。曰思。曰寤。曰喜。曰懼。季冬聘王夢。獻言夢於王。王拜而受之。及舍萌於四方。以贈惡夢。舍萌者。猶釋菜也。贈者。送之也。詩書禮經。所載高宗夢得說。頌文王夢帝與九齡武王伐紂。夢協朕卜。宣王考牧。牧人有熊羆虺蛇之夢。召彼故老。訊之占夢。左傳所書尤多。孔子夢坐奠於兩楹。然則古之聖賢。未嘗不以為大。是以見於七略者。如此晉魏方技。猶時或有之。今人不復留意此卜。雖市井妄術。所在如林。亦無一人以占夢自名者。其學豈絕乎。

○○衛樂剖析想因夢論

衛玠總角時。問樂令廣夢。樂云是想。衛曰。形神所不接。豈是想耶。樂云。因也。未嘗夢乘車入鼠穴。擣虀取鍼杵。無想無因故也。衛思經日不得。遂成病。樂為剖析之。衛即小瘥。樂歎曰。此兒胸中。必無膏肓之疾。

○○論衡龜夢同占論

占夢與占龜同

○○論衡直夢象類論



人亦有直夢。夢見甲。明日則見甲矣。夢見君。則明日見君矣。如夢見甲與君。甲與君則不見也。甲與君不見。故夢見甲與君象類之也。

○殷浩夢尸夢穢論

或問殷浩曰。將蒞官而夢棺。將得財而夢糞。何也。浩曰。官本臭腐。故將得官而夢尸。錢本糞土。故將得財而夢穢。時人以爲名言。

○王叔和脉經夢論

與素問略相同

晉太醫令王叔和脉經云。肝氣虛則夢見園苑生艸。得其時則夢伏樹下不敢起。肝氣盛則夢怒。厥氣客於肝則夢

山林樹木。厥氣客於膽則夢鬪訟。心氣虛則夢救火陽物。得其時則夢燔灼。心氣盛則夢喜笑及恐畏。厥氣客於心則夢丘山煙火。心氣虛合目欲眠。夢迷行而精神離散。厥氣客於小腸則夢市邑街衢。脾氣虛則夢飲食不足。得其時則夢築垣蓋屋。脾氣盛則夢歌樂體重手足不舉。厥氣客於脾則夢丘陵大澤。壞屋風雨。厥氣客於胃則夢飲食。肺氣虛則夢見白物。見人斬血籍籍。得其時則夢見兵戰。肺氣盛則夢恐懼哭泣。厥氣客於肺則夢飛揚。見金鐵之器奇物。厥氣客於大腸則夢田野。腎氣虛則夢見舟船溺人。得其時夢伏水中。若有畏怖。腎氣盛則夢腰脊兩解不



屬厥氣客於腎則夢臨淵沒居水中厥氣客於膀胱則夢遊行

○○蕭方等夢魚化鳥論

梁世子方等著論云吾嘗夢為魚因化為鳥當其夢也何樂如之及其覺也何憂斯類良由吾之不及魚鳥者遠矣故魚鳥飛浮任其志性吾之進退恆存掌握舉手懼觸搖足恐墜若使吾終得與魚鳥同遊則去人間如脫屣耳

○○白居易飢渴致夢論

渴人多夢飲飢人多夢食

○○六書精蘊夢想邪漫論

其夢也邪晝有邪想也其夢也漫晝有漫想也

○○程子夢寢是理論

心所感通只是理也如夢寢皆無形只是有此理

○○朱子所為所夢各以類應論

人之精神與天地陰陽流通故晝之所為夜之所夢其善惡吉凶各以類應

○○朱子寤寐感通論

寤寐者心之動靜也有思無思者又動中之動靜也有夢無夢者又靜中之動靜也但寤陽而寐陰寤清而寐濁寤有主而寐無主故寂然感通之妙必於寤而言之周禮獻



吉○夢○贈○惡○夢○其○於○天○人○相○與○之○際○察○之○審○而○敬○之○至○矣○

○王魯直病囚窮達夢論

病○人○多○夢○醫○囚○人○多○夢○赦○窮○人○夢○富○貴○達○者○夢○神○僊○

○呂東萊夢以類至論

人○之○精○神○與○天○地○陰○陽○流○通○故○夢○各○以○類○至○知○此○者○則○可○以○言○性○命○之○理○矣○

○呂東萊夢寐未必盡繇想因所致論

形○神○相○接○而○夢○者○世○歸○之○想○形○神○不○接○而○夢○者○世○歸○之○因○因○之○說○曰○因○羊○而○念○馬○因○馬○而○念○車○因○車○而○念○蓋○固○有○牧○羊○而○夢○鼓○吹○曲○蓋○者○矣○是○雖○非○今○日○之○想○實○因○於○前○日○之○

想○故○因○與○想○一○說○也○信○如○是○說○無○想○則○無○因○無○因○則○無○夢○舉○天○下○之○夢○不○出○於○想○而○已○矣○然○叔○孫○穆○夢○豎○牛○之○貌○於○牛○未○至○之○前○曹○人○夢○公○孫○彊○之○名○於○彊○未○生○之○前○是○果○出○於○想○乎○果○出○於○因○乎○雖○然○起○廣○樂○於○九○原○吾○知○其○未○必○能○定○是○議○也○

○輔廣占夢謹人天之際論

詳○占○夢○之○意○先○王○致○謹○於○人○天○之○際○可○謂○密○矣○惜○乎○古○法○不○傳○也○後○世○之○人○情○性○不○治○晝○之○所○為○猶○且○昏○惑○瞽○亂○不○自○知○覺○則○其○見○於○夢○寐○者○率○多○乖○戾○未○必○與○天○地○之○氣○相○流○通○縱○有○徵○兆○之○可○驗○者○亦○須○迂○迴○隱○約○必○待○既○驗○而○後○



可知。古法若存。未必能盡占也。


○○王晦叔立官以察夢寐妖祥論

天人同流。相應而不遠。先王必立官以觀妖祥。辨吉凶。所以和同天人之際。使之無間也。

○○王潛夫夢列篇論

夢列篇曰。夢有直。有象。有精。有想。有人。有感。有時。有反。有病。有性。昔武王邑姜娠太叔。夢帝謂已。命爾子虞。而與之唐。及生。手文曰虞。因以為名。成王滅唐。遂以封之。此直夢也。詩曰。維熊維羆。男子之祥。此象夢也。孔子思周公。夜即夢之。此精夢也。人有思。即夢其至。有憂。即夢其事。此想夢也。

也。今事。貴人夢之為祥。賤人夢之為殃。君子夢之為榮。小人夢之為辱。此人夢也。陰雨之夢。使人厭迷。陽旱之夢。使人亂離。大寒之夢。使人怨悲。大風之夢。使人飄飛。此感夢也。春夢發生。夏夢高明。秋冬。夢熟藏。此時夢也。晉文公城濮之戰。夢楚子伏已而盥其腦。本大惡也。及戰。乃大勝。此反夢也。陰病夢寒。陽病夢熱。內病夢亂。外病夢發。百病之夢。或散或集。此病夢也。人之心。情好惡不同。或以此吉。或以此凶。當各自察。常占所從。此性夢也。故先有所夢。後無差忒。謂之直。比擬相肖。謂之象。凝念注神。謂之精。晝有所思。夜夢其事。乍吉乍凶。善惡不信。謂之想。貴賤賢愚。男女





長少。謂之人。風雨寒暑。謂之感。五行旺相。謂之時。陰極則吉。陽極則凶。謂之反。觀其所疾。察其所夢。謂之病。心情好惡。於事有驗。謂之性。此十者。占夢之大略也。而決吉凶者。多失其類。豈覺爲陽。寐爲陰。陰陽之務。相反故耶。此亦謂其不甚者。爾如使夢吉事而已。意大喜樂。則真吉矣。夢凶事而已。意大憂懼。則真凶矣。所謂春夏夢生長。秋冬夢死傷也。凡察夢者。清潔鮮好。貌堅體健。竹木茂美。宮室器皿。新成方正。開通光明。溫和升上。向興之象。皆爲吉喜。謀從事成。穢臭污濁。腐爛枯槁。傾倚欹斜。剝削不安。閉塞幽昧。解落墜下。向衰之象。皆爲凶懼。計謀不從。舉事不成。妖孽

怪異。可憎可惡之事。皆爲憂患。圖畫卵胎。刻鏤非真。瓦器虛空。皆爲欺給。倡優俳舞。併小兒所戲弄之物。皆爲觀笑。此其大都也。夢或甚顯而無占。或甚微而有應。何也。曰。所夢不察而懵憤冒名也。故亦不專信以斷。今人相對計事。尚有不從。沉慌忽雜。夢亦何必乎。唯有精誠所感。神靈所告者。乃可占耳。故君子之異夢。非妄也。必有所事故焉。小人之異夢。非榮也。必有真機焉。今一寢之夢。或屢遷化。百物代至。而其主不能究道之。故占者有不中。此非占之罪也。乃夢者過也。或其夢審矣。而占者不能連類博觀。故其夢有不驗。此非書之陋。乃說之過也。故占夢之難者。讀其書



為難也。夫占夢必審其變。故審其徵候。內考情意。外考王相。則吉凶之符可見也。且凡人之見瑞而脩德者。福必成。見瑞而縱恣者。福轉為禍。見妖而驕侮者。禍必成。見妖而戒懼者。禍轉為福。故太姒有吉夢。文王不敢康吉。祀於羣神。然後占於明堂。竝拜吉夢。脩省戒懼。聞喜若憂。故能成吉。以有天下。虢公夢見蓐收。賜以土田。自以為有吉。史嚚令國人賀夢。聞憂而喜。故能成凶。以滅其封。易曰。使知懼。又明於憂患與。故凡有異夢感心。無問善惡。常恐懼脩省。以德迎之。乃能逢吉。

○○餘冬序錄圓夢論

令人說圓夢。元周密視聽鈔。以南唐近事。馮僕舉進士時。有徐文幼能圓夢為證。不知唐李德裕次舊聞。已有之。安祿山之叛。黃幡綽陷在賊中。及收復。有言幡綽與逆賊圓夢。必知其不可也。圓夢字見此。又秦再思紀異錄。長安興義寺。有圓夢堂。寺乃神堯賜禪智滿常住者。滿以圓夢得驗。而堂以得名。圓夢之說。蓋唐之前。已有之矣。

○○倫道全今人說夢論

茸談曰。今人說夢。有醒而述其所見。為說夢者。有夢中述其所夢。為夢中說夢者。有夢中見夢。覺而後知其為夢中作夢者。有三醒三夢。夢悉如前而不改者。有平常所夢。如



期而復夢其事歷年若是者有所夢驚覺轉睡而仍接前  
夢者有甲夢乙而乙亦夢甲兩夢相應者有甲夢如是而  
乙夢亦如是兩夢相同者不可類述皆神魂變幻難以臆  
測也

〇〇皆夢軒說

余客松上夢一道士戴華陽巾着黃練衣者來訪余揖而  
問曰客誠有道之士耶何衣冠之異也客笑曰子未聞道  
也吾身蛻也衣又吾之所以蛻所蛻也蛻且非吾有蛻所  
蛻吾為乎有哉余曰若是則遊方之內者縣而未解也請  
論縣解可乎客曰然子以淳于棼之典郡責乎曰不足責

也子以莊周之為胥樂乎曰甚樂客曰是二者皆未足以  
語縣解也敢問何謂耶曰汝於周則樂於棼則不貴豈以  
螳夢則夢胥夢則非夢也於一夢而別二夢是非縣之未  
解乎今吾有術能與萬物變化試使汝一為胥一為螳子  
且樂乎且不樂乎抑將以胥為樂螳為不樂乎曰悉不願  
也曰然則子於胥夢悅於螳夢憂悅為火災憂為寒水寒  
熱戰於內冰炭膠其胸縣之不解不既深乎且子嘗於夢  
曉夢乎曰有之嘗於夢曉夢覺乎曰未也曰諾哉今巖穴  
之客江湖之士投簪紱而謝人事其往幾人其來復幾人  
吾視此猶夢曉夢也非夢曉夢覺也曉夢覺者孰有覺而



曉夢之樂乎。人能於夢曉夢而不能於夢曉覺。是故終身遊於大夢而不知覺也。於夢曉覺者其唯聖人乎。然夢覺可以致而不可以傳也。遊日中者忘昏夜之幽。趨燈燭者忘暗室之陋。吾燭子以暗室之光而不知大道之冥。皎子以望舒之魄而不知陽烏之赫。與子遊夢而不知栩栩之非吾。是以道可致而不可言。縣可言而不可解。詎不信夫。於是恍然而醒。惕然而起。不知夢之爲吾。吾之爲夢。童子擁篲而進曰。皆夢先生來也。遂理前夢爲皆夢軒說。

○○鏡玉子夢覺解

有引

呂仙祠在邯鄲之北。呂仙憇此。遇盧生自款貧厄。

世緣未了。仙以枕授生曰。枕此。令子榮適如意。主人方炊黃梁。生就枕。夢畢。姻登第。歷官中書令。年八十卒。而寤。睨翁在旁。炊梁尚未熟。謝曰。先生教我矣。後人榜其奇。祠其地。貌其神。而盧生睡像存焉。鏡玉子與客徘徊久之。愀然問客曰。若以爲玄乎。人盡盧生。人不盡悟盧生也。逐塵緣之覆鹿。任身徑之亡羊。過鳥流雲。何塞清虛一竅。草根木蒂。徒牽綠縲千容。試問盧生未遇時。化去時。醒回時。誰真誰幻。誰夢誰覺。說法經云。一性自往來。寤寐都爲幻。生滅二因離。是則常真實。道德經云。生



化化又云不生不化。夫人止一性萬劫恆靈。但迷此卽斷脩此卽了。區區天子之形體。畢竟還天。天不有形體。而人欲據之爲有乎。況形體中之榮枯。之得失之愉拂。石中火。水中漚。電中光。鏡中影乎。獨是本性不迷。造化在我。至人脫離生死。以此耳。若見夢覓覺。覺卽是夢。認真認幻。真亦非真。本無夢也。而意授塵塵。授夢夢轉。開覺本無生也。而靈寄形。形寄生。生終歸化。烏知赫赫者。非斲於仙枕也。烏知營營者。非角於虛空也。百年食息。總似黃梁。一瞬韶華。渾如迷寐。藉不控定性。關尋出世路。

正恐炊未熟而夢已殘。一性落萬輪中能堪幾虛度乎。客然其言。遂銓演其義。作夢覺解三十首。

其一

塊形隨化轉。空靈轉夢覺。何徂夢中身。何添夢後覺。

其二

枕上非非夢。夢中非非覺。寤來身外身。立證覺中覺。

其三

覓覺覺仍夢。破夢夢成覺。四大總幻形。來去何悲樂。

其四

夢中還夢夢。夢後幾覺覺。真性本無形。迷夢縛空殼。



其五

塵攘非關夢。明妙非關覺。撒手坐懸崖。魂清夢亦覺。

其六

無中有成夢。有中無纔覺。參證無生解。玄棲脫糞殼。

其七

晝夜兩平分。夢覺半相角。駒隙夢中身。清晝孰先覺。

其八

世宙一蘧廬。義輪驅夢覺。堪笑利名場。勞勞夢裏角。

其九

不醒百年夢。長迷萬輪覺。濁利固蜨丸。浮名亦蝸角。

其十

解道塵爲夢。孰圓夢處覺。一絲了不牽。沆瀣亦可啄。

其十一

覺海淘無始。夢團轉妙覺。陸地有蓬瀛。風塵漫白駁。

其十二

爐火炊邊夢。未熟何先覺。靈藥自心苗。黃梁等五濁。

其十三

一枕八十秋。方炊夢已覺。古今如電光。仙枕亦塵殼。

其十四

化夢隨化身。化中身似覺。夢殘身孰是。幻形構幻覺。



其十五

夢生復夢滅。無覺轉生覺。妄起生滅因。回頭返大覺。

其十六

化生儵生化。孰夢更孰覺。生化識前因。靈光納五嶽。

其十七

夢裏囂塵絕。夢回止帶覺。冷然一虛無。尋覺已無覺。

其十八

茫茫競空華。真如夢未覺。石火與泡漚。到頭覺不覺。

其十九

虛轉劫中夢。誰招三昧覺。不謂六根空。試悟蛻蟬殼。

其二十

浮生一大夢。參來夢即覺。萬劫一炊中。真靈堪幾剝。

其二十一

細人迷劫夢。豪人騁慧覺。火馳燒空靈。北邙冷荒覺。

其二十二

大巧械為君。機鋒剗性覺。一瞬鐘漏殘。巧貢蟻鳶啄。

其二十三

一枕繁華夢。蕭然遽遽覺。何如淨塵根。混沌了未斲。

其二十四

筌解擯虛無。請印黃梁覺。一嘯乾坤空。月光那可捉。



其二十五

倪真纔倪幻。大夢在大覺。夢覺多幻因。妙竅還其朔。

其二十六

有塵因有夢。無夢亦無覺。雲浮與月空。月明光自連。

其二十七

至人本無夢。至覺亦無覺。仙翁轉法輪。游戲點夢覺。

其二十八

無分周與蝶。疇知夢與覺。將無甯仙枕。覈玄早證覺。

其二十九

亦解謝塵纓。主恩重山嶽。舒卷雲無心。空澄不礙覺。

其三十

枕上盧生夢。終古阿誰覺。疑是夢游仙。夢中解夢覺。

○○高陽生五臟虛實發夢歌

附錄全篇○吳郡姚可成增補

心臟歌

心臟身之精。小腸為弟兄。

音薰

心也者。隨機應變。主宰萬物。而為一身之主。故曰身之精。朱子有曰。天君泰然。百體從令。丙屬小腸而剛。丁屬心。火而柔。剛在先而為兄。柔在後而為弟。二者俱係君火。同氣連枝。故言弟兄。而不言夫婦。心之夫。膀胱是也。小腸之婦。肺金是也。

象離隨夏旺。屬火向南生。

離之為卦。其中空虛。心臟屬火。亦猶是也。火旺於夏。所以隨夏而旺。南方乃丙丁巳午。正陽君火之位。故向南



任物無纖巨多謀最有靈。

任物。任親萬物也。纖。小也。巨大也。人心應物。小大無不任親。朱子曰。人心之靈。莫不有知。所以鉅細精粗。多謀用。

內行於血海外應舌將榮。

血海。肝也。心主血。肝藏之。故內行血海。舌乃心之竅。心氣通於舌。故外應乎舌。而舌能知五味。

七孔多聰慧三毛上智英。

多聰慧者有七孔。上智英者有三毛。其次則不全矣。

反時憂不解順候脉洪驚。

心屬火而旺夏。反得冬脉沉濡而滑。此乃腎邪干心。水來尅火。謂之賊邪。是可憂也。順候。診得夏脉也。驚者。大

而散也。其脉洪大而散。謂之順候。

液汗通皮潤聲言爽氣清。

腎主液。入心為汗。肺主聲。入心為言。水能尅火。汗通則腎水平而皮潤。火不受水賊矣。火能尅金。言爽則肺金不受火侵矣。

伏梁秋得積如臂在臍繫。

經曰。腎病傳心。心當傳肺。肺旺不受邪。心復欲還腎。腎不肯受。留滯為積。故知伏梁。以秋庚辛日得之。其積形狀如手臂環於臍畔。繫係而不動也。

順視雞冠色凶看瘀血凝。

雞冠。色之赤者也。瘀血。赤而黑者也。赤乃本色而為順。黑則水來尅火而凶矣。通津子曰。心其色赤。然心藏於內不得見。此云順視雞冠。凶看瘀血。叔和脉經云。五臟有五色。皆見於面。又當與寸口尺內相應。假令色赤者



赤脉浮大而散。赤。心色也。浮大而散。心脉也。以此言之。五臟之色。皆可察之於面也。

診時須審委細察在叮嚀。

凡醫須行望聞問切。上文言視其色之難。冠瘵血而知其吉凶。聞其聲言爽亮而知其氣清。問其所苦而知其病之委曲。切其脉而知其反時順候。

實夢憂驚怪虛翻烟火明邪侵雷震恐精奪日陰沉清寧觀止水縈絆見徽繩煩擾多蟲蟻寬舒遇坦平人心無限夢觸類自能伸。

心臟有餘則夢中或憂或驚或怪異之事。心臟不足則夢烟火光明化竭而見本矣。外邪乘於心經則夢雷聲震恐以心為一身之主宰。既有客邪相干。夢中必有驚悸跳躍。霹靂恐嚇之事。若心氣精元虛損則夢日光黯淡。翳障蔽空之象。蓋人之心。如天之日也。若久心事清淨無欲則夢見止水澄澈。池沼清冷。天光雲影。上下。

色。心情牽掛則夢亂絲結繩膠紐難解。心事冗雜多端則夢蛆蟲蠅蟻蝟集身體。心境寬暢則夢坦途廣陌。來往自如。人之夢寐幻化無方。自宜觸類而解。

肝臟歌

肝臟應春陽。連枝膽共房。

肝屬木而應春。連枝。即心臟弟。兄之義也。共房。肝膽同一處也。

色青形象木。位列在東方。

肝之色青。木之色亦猶是也。肝臟之形如木之幹。東方甲乙寅卯木。木所居之位。故列在東方也。

含血榮於目。牽筋爪運將。

肝藏血而為血海。故能含血。其候在目。其華在爪。其充在筋。所含之血榮於目。牽引於筋爪。故目能視。足能步。掌能握。指能捻而運動也。



逆時生恚怒。順候脉弦長。

肝屬木而應春。當反得秋脉。浮短而濇。謂之逆時。為金來尅木。木受尅。則不得舒暢。故生恚怒。順候。其脉弦而長也。

泣下為之液。聲呼是本鄉。

腎主液。入肝為泣。肺主聲。入肝為呼。泣與呼。皆屬於肝。故曰本鄉。

味酸宜所納。麻穀應隨糧。

肝其味酸。其穀麥與麻。乃肝家之味與糧食也。

翠羽身將吉。顏同枯艸殃。

肝臟色青。翠羽色青而紅。枯艸色青而白。紅屬心火。白屬肺金。木生火。故曰吉。金尅木。故曰殃。

積因肥氣得。杯覆勝隅傍。

經曰。肺病傳肝。肝當傳脾。脾季夏適旺。旺者不受邪。肝復欲還肺。肺不肯受。故留結為積。名曰肥氣。以季夏戌巳日得之。狀如覆杯。在左脇下。

實夢山林樹。虛看細艸芒。邪干多夢怒。血少夢中盲。火焰

肝家盛。汪洋肝氣。狂風吹萬物。春夢應時昌。樓閣驚傾。倒。秋時夢不祥。肝經多夢幻。審察在斟量。

潔古曰。甲剛為木。故實夢山林樹。巳柔為艸。故虛看細艸芒。邪入肝經。則肝氣有餘。故夢中多恚怒。目得血而明視。肝經血少。夢中則有盲瞽之兆。肝屬木。火為木之子。子能令母實。故夢火灼者為肝家盛。水生木。為肝之母。母能令子虛。故夢水漂者為肝氣衰。夢風吹拂者。若在正二三月。為春風及物。肝家應時之夢。大是佳兆。夢中樓臺塌倒。梁柱崩摧。且在七八九月。為金旺木衰。肝經失時之夢。大不宜也。

腎臟歌



腎臟對分之。膀胱共合宜。

腎有兩枚相對而垂。但右為命門。有水火之異。命門以三焦為腑。然其氣與腎相通。況三焦有名無形。膀胱一腑。腎與命門共合為宜。

旺冬身屬水。位北定無欺。

腎屬水而旺於冬。位列北方。定無欺。言之不虛也。

兩耳通為竅。三焦附在斯。

耳者腎之竅。腎氣通於耳。故叔和以兩耳為腎氣所通。而為腎竅。三焦者。手少陽之經也。三焦有名無形。為原氣之別。依附於兩腎之間。

味鹹歸藿荳。

潔占曰。腎象水而味鹹。藿者藿菜。常言落藿也。荳者黑荳也。外則味鹹。內則應骨。

精志自相隨。

腎臟對分。左者為腎。右為命門。腎藏志。命門藏精。精完則志備。志備則精完。二者自然相隨。

沉滑當時本。

腎旺亥子之月。是時診得脉沉而滑。是本臟之脉。無他干也。

浮灘厄在脾。

灘。緩也。雲岐子曰。腎旺冬。其脉當沉而滑。今反浮而緩。是土來乘水。故厄在脾。

色同烏羽吉。形似炭煤危。

腎色黑。烏羽。黑而青者也。青屬肝。是水生木。故目吉。炭煤。黑而黃者也。黃屬土。是土剋水。故曰危。

冷即多成唾。焦煩水易虧。

水盛則火滅。火滅則冷。冷則水溢於上而多唾。火盛則水乾。故焦煩。焦煩則津液衰而喜飲矣。



奔豚臍下積究竟骨將痿。

竟終也。經曰腎之積名曰奔豚。發於小腹。上至心下。若豚狀。或上或下無時。久不已。令人喘逆骨痿。少氣。以夏丙丁日得之。

實夢腰難解。虛行溺水滑。精衰如畏捕。腎熱夢中遺。邪淫

來干擾。腰肢夢痿疲。腎經無限夢。虛實細論推。

經曰。腰者腎之府。腎邪實。則經血留滯而不通。故夢中腰有所繫。腎氣虛。則化竭而見本。故夢溺於水滑。腎藏精與志。若精虛則志失。夢中當見畏恐。如人捕捉之象。腎家火熱乘之。則夢鬼交而遺也。或因中水濕。著於腎經。夢中覺腰肢軟弱。不能起立。腎家有無限之夢。須細推之。

肺臟歌

肺臟最居先。大腸通道宣。

體居各臟之上。用為各經之始。故曰居先。肺主氣。大腸乃肺之腑而行氣。為傳送之官而宣化也。

兌為八卦地。金屬五行牽。

肺居兌方而屬金。以八卦論之。居於兌地。五行論之。木水火土。皆起於金也。

皮與毛相應。

肺主皮毛。故曰相應。

魂將魄共連。

肝藏魂。肝木受氣。中。肺藏魄。肺金受氣於寅。二者相為運用。故曰相連。

鼻聞香氣辨。壅塞氣相煎。

經曰。肺氣通於鼻。鼻和則知香臭矣。壅塞不通也。相煎。邪氣迫於肺氣也。

語過多成嗽。



肺主氣。語言太過。則氣傷矣。嗽疾於是而作焉。

瘡浮酒灌穿

酒。濕熱之物也。瘡多起於濕熱。肺主皮毛。酒過多。則濕熱傷肺而皮分生瘡。故曰瘡浮。

猪膏凝者吉。枯骨命難全

雲岐子曰。肺病色白而光澤。白者金也。光澤者水也。是金能生水。故云吉也。枯骨之色。白而不澤。白是金也。不澤者。內失其水。以火就燥也。火來尅金。故云命難全也。

本積息賁患。乘春右脇邊

經曰。肺之積。名曰息賁。在右脇下。覆大如杯。以春甲乙日得之。何以言之。心病傳肺。肺當傳肝。以春適旺。旺者不受邪。肺欲復還心。心不肯受。故留結為積。故知息賁。以春甲乙日得之。

順時浮濇短。反即大洪弦

肺屬金而旺秋。其脉當秋浮濇而短。謂之順時。若洪大而弦。風火勝金。謂之反候。

實夢兵戈競。虛行涉水田。寒邪空墜雪。火熱燎炎天。風入

乾金象。飛揚夢裏顛。暑邪干肺位。夢裏首如懸。

金盛主殺。肺氣實。故夢兵戈相競。北方屬水。乃金衰墓之鄉。肺氣虛。故夢涉於水田。寒邪入肺。肺本清虛之臟。雪為嚴凍之凝。故夢空中飛雪。熱在肺經。肺本輕浮。居至高之位。故夢火焰燒天。風邪入肺。風主動。故夢中飛揚顛倒。暑邪干肺。肺在上。故夢如倒懸也。

脾臟

脾臟象中坤安和對胃門

脾屬土。位居金木水火之中。八卦論之。寄旺西南坤位。前木火後金水。亦居於中。故象中坤。其體靜而其用動。安和者。不為飲食勞倦所傷也。胃為戊。其化火。象於天。其氣熱。脾為巳。其化濕。象於地。故下熱而土濕。其氣相



通。故對胃門。

旺時隨四季。

四季辰戌丑未月也。

自與土為根。

土於辰戌丑未之月。後各旺一十八日。故隨四季。脾屬土。土既旺。則脾亦旺。故云自與土為根也。

磨穀能消食。

脾濕胃熱。濕熱相蒸。蒸故能磨化穀食也。

榮身性本溫。

熱盛則傷胃。寒盛則傷脾。溫者不寒不熱也。溫則脾胃平和。於是穀入於胃。脈道乃行。水入於經。其血乃成。脾主裹血。胃主行氣。而播於各臟。行於一身也。

唇通口氣。

脾之華在唇。四白。故應唇。脾氣通於口。脾和則口知五味。故曰應唇通口氣。

運肉潤肌臀。

潤。肥澤也。脾主肉分。氣壯。則肌臀肥澤。

形扁才三五。

廣闊也。脾之形。三寸闊。五寸長。

膏凝散半斤。

脾之傍有散膏半斤。主裹血。

順時脈緩慢。

脾旺四季。脈氣之來。阿阿緩慢。若春之楊柳。謂之順時。



失則氣連吞

氣即脉氣也。脉氣如連吞嚙而來。即雀啄屋漏之脉。脾衰乃見。故曰失矣。

痞氣冬為積

經曰。脾之積。名曰痞氣。在胃脘。覆大如盤。久不愈。令人四肢不收。發黃疸。飲食不為肌膚。以冬。壬癸日得之。何以言之。肝病傳脾。脾當傳腎。腎以適旺。旺者不受邪。脾復欲還肝。肝不肯受。故留結為積。故知痞氣。以冬。壬癸日得之。

皮黃四體昏

脾主肌肉。黃為脾土之色。脾土既病。則本臟之色。見於皮表。脾主四肢。脾病則四肢昏軟。

濕多成五泄

五泄者。胃泄。脾泄。大腸泄。小腸泄。大瘕泄。五泄是也。

走若雷奔

雷奔者。腸走鳴也。虛寒相薄。則為腸鳴。

實夢歌歡樂。虛爭飲食。分土衰遊大壑。太旺上高陵。濕勝身難舉。思傷陷阱坑。脾經諸病夢。幻化自紛紜。

脾聲歌。實則夢與。故歌而歡樂。虛則夢取。故相爭奪。脾土衰。則水泛濫無制。故夢居大水。太過。則夢登高陵。大阜。濕氣在脾。則夢身重不舉。思想太過。則脾氣鬱結。故夢陷入坑阱中。脾經之邪正虛實。各有夢兆。紛紜疊見也。

夢林玄解論集卷之一

大玄解

卷之一

輯古

三

夢論



夢林玄解論集卷之二目錄

夢論 總標曰夢占逸旨

真宰篇 論神魂成夢之旨

秘義篇 論占夢靈秘之旨

無邪篇 論聖凡異夢之旨

昊天篇 論昊天夢應之旨

雷雨篇 論雷電雨澤星宿雷霓等夢之旨

形貌篇 論夢形體腹臍毛髮等兆之旨

器物篇 論器物夢應之旨

筆墨篇 論夢文房寶翰詞賦吟咏兆應之旨

原始篇 論夢經所始之旨

釋妄篇 論經史占夢之旨

感變篇 論九端推夢之旨

日月篇 論夢日月休祥之應

山川篇 論山水臺閣城郭廟宇等夢應之旨

食衣篇 論夢食物衣服兆應之旨

財貨篇 論夢珠玉金錢錦帛等兆應之旨

字畫篇 論字畫拆合夢應之旨

良藥舉思對剖術社 輒發諸夢以外自餘錄

寶夢相燿樂 盡畢為命合土寒涉大壁大珥土高封鼎親

寒味萬限為則則 書本春即去即也

去法

夢林玄解論集卷之二目錄

夢論

總標曰夢占逸旨

真宰篇

論神魂成夢之旨

秘義篇

論占夢靈秘之旨

無邪篇

論聖凡異夢之旨

昊天篇

論昊天夢應之旨

雷雨篇

論雷電雨澤星宿雷霓等夢之旨

形貌篇

論夢形體腹臍毛髮等兆之旨

器物篇

論器物夢應之旨

筆墨篇

論夢文房寶翰詞賦吟咏兆應之旨

原始篇

論夢經所始之旨

釋妄篇

論經史占夢之旨

感變篇

論九端推夢之旨

日月篇

論夢日月休祥之應

山川篇

論山水臺閣城郭廟宇等夢應之旨

食衣篇

論夢食物衣服兆應之旨

財貨篇

論夢珠玉金錢錦帛等兆應之旨

字畫篇

論字畫拆合夢應之旨



科第篇

論夢主甲第魁元  
加爵陞秩之旨

神怪篇

論神鬼怪  
夢之兆

壽命篇

論壽算脩促棺槨  
幽宮等夢應之旨

鳳鳥篇

論禽鳥夢  
應之旨

獸羣篇

論獸屬夢  
應之旨

龍蛇篇

論蛟龍蛇虺  
夢應之旨

龜魚篇

論魚鼈昆蟲  
夢應之旨

草木篇

論艸木花卉果  
實夢應之旨

施報篇

論善惡殃祥報  
應見夢之旨

圓智篇

論占夢貴乎  
簡要之旨

夢林玄解論集卷之二目錄

夢林玄解論集卷之二

明

應城

養吾陳士元

纂輯

茂苑

紫水黃夢堂

增補

夢論

○ ○ 夢占逸旨

有序

嘉靖壬戌之秋。八月既望。陳子坐蒲陽軒中。睇月  
色之漸高。欣桂華之始放。感盈虧之轉轂。念榮瘁  
之循環。於是舉酒命酌。興發成酣。枕簟載清。隕然  
就寢。夢皓眉之老叟。披霞服而降庭。授予一函。金  
文炫目。宛科斗之古篆。欲宣誦而未能。藏襲袖間。



猶恐遺脫。獲茲奇玩。心復生疑。乃再拜問。叟曰。予與君遇。無乃夢乎。叟笑曰。何遇非夢。何夢非真。忽起譙聲。予遂驚寤。晨興喟歎。是何祥也。研思終日。莫得其繇。嗟夫。夜之遇叟也。其真也耶。晨之喟歎也。其夢也耶。將詢兆於占人。慨輝經之墜地。輒據見聞之末。撰茲內外之篇。用述微悰。題為逸旨。拂常隱語。豈追醉夢之譏。遁世朽夫。聊增嚔譚之助。爾壬戌九日。應城養吾道人陳士元識。

○真宰篇

論神魂成夢之旨

真宰窈冥。無象無形。鴻濛渾穆。氣數斯涵。氣判陰陽。數苞

終始。天旋地凝。兩間定位。而人物生矣。人葆冲和。肖乎天地。精神融貫。無相盪也。天氣為魂。地氣為魄。氣清者。魄從魂。氣濁者。魂從魄。從魂為貴。從魄為賤。清魂為賢。濁魄為愚。此壽夭禍福之閫也。有貴而賢。有賤而愚。有壽而福。有夭而禍。有貴而賢。有賤而愚。有壽而福。有夭而禍。有貴而愚。有賤而賢。有壽而禍。有夭而福。世變無恆。幾則先肇。魂能知來。魄能藏往。人之晝興也。魂麗於目。夜寐也。魄宿於肝。魂麗於目。故能見焉。魄宿於肝。故能夢焉。夢者神之遊。知來之鏡也。

○原始篇

論夢經所始之旨



長柳之演。載諸藝牒。其詳不可得聞。已周官大卜掌三兆。三易三夢之法。三夢。一曰致夢。二曰箚夢。三曰咸陟。又以八命贊三兆。三易三夢之占。以觀吉凶。夫兆倚龜而徵。易賴著而顯。著龜外物也。聖人設教。利用猶足以通於神明。稽乎大疑。乃若夢本魂涉。非由外假。度其端倪。探其隱蹟。則榮枯得喪。烏得而違諸。

○秘義篇

論占夢靈秘之旨

衆占非一。惟夢爲大。夢與兆易準。故三代尚焉。洛出丹書。乃設九疇。兆法著矣。河出綠圖。乃列入卦。易法行矣。占法之秘。固性命之理。而兆易之揆也。三兆之體。其經皆百有

二十。其頌皆千有一百。三易之體。其經皆八。其別皆六十。有四。三夢之輝。其經皆十。其別皆九十。夢與兆易。豈有隆降矣。武王伐紂。夢協朕卜。衛史朝曰。筮襲於夢。武王所用。非達觀陰陽之故。深究天人之際。其孰能與於此。

○釋妄篇

論經史占夢之旨

宗空生問於通微主人曰。夢者。幻也。與露電泡影等。一切起滅。皆歸虛妄。主人曰。汝奚不稽之古乎。軒轅氏有華胥錄圖。風后力牧之夢。堯有攀天乘龍之夢。舜有長眉擊鼓之夢。禹有山書洗河乘舟過月之夢。桀紂有黑風大雷之夢。文王有日月丈人海婦之夢。太公有輔星之夢。孔子有



先君芻兒三槐赤氣之夢。女節有接星之夢。太姒有松柏  
 棧柞之夢。伊母有白水之夢。孔母有空桑蒼龍之夢。比事  
 皆乎。何為虛妄。生曰。此緯錄稗說。六經未載也。主人曰。九  
 齡之與。兩楹之奠。記於禮經。而春秋傳說。夢尤繁。若晉侯  
 夢熊。宋公夢鳥。呂錡夢射。凡聲伯夢涉洹。魯昭夢襄公。宋  
 元夢平公。晉文夢楚子。衛莊夢良夫。丞鉏夢康叔。燕妹夢  
 伯儵。曹人夢振鐸。鄭人夢伯有。趙盾夢叔帶。荀偃夢巫臯。  
 魏顆夢老人。韓厥夢其父。穆子遇庚宗之婦。僖子納泉丘  
 之女。以至羸童二豎。天使河伯之名。罔不紛陳錯綴。而邑  
 姜之夢。虞寔述於博物之子產。往代君子。覽而業之。垂及

千載。豈皆習誕。而承贖耶。生曰。禮記諸篇。或雜漢語。左氏  
 務博。未免浮夸。何足符信也。主人曰。汝以師心之識。滯其  
 圓神爾。夫商周之書。小雅之詩。非聖人之所刪定者邪。高  
 宗夢說。審象旁求。武王誓師。朕夢協卜。而宣王築室。考牧  
 有熊羆。虺蛇。衆魚。旒旗之夢。又使大人占之。致其嚴重。未  
 敢褻也。雖幽王之朝。訛言莫懲。猶且召彼故老。訊之占夢。  
 然則古人曷嘗忽厥夢占哉。而緯稗所載。足用資擇。胡可  
 概以為寤而無辨也。

○無邪篇 論聖凡異夢之旨

至人無夢。茲蓋虛談云。人而無夢。槁形灰心之流。不寐不



覺不生不滅。所樹異教也。聖人莫加於孔子。孔子壯則夢見周公。卒則夢奠兩楹。豈語怪哉。赤子之生。方浹旬日。其寢而寐。乳之弗受。携之弗驚。已或迥然笑焉。或艷然怒。寤以啼焉。謂之夢笑。夢啼。徐而叩之。實未嘗寤也。夫赤子無感。何喜何怒。而夢有所成。則氣爲之充。而神爲之使也。聖人之心。不異赤子。託神靈府。含陰吐陽。非無夢也。無妄夢以亂智爾。楊朱乃謂五帝之事。若覺若夢。其不免岐路之悲乎。

○感變篇

論九端推夢之旨

感變九端。疇識其由然哉。一曰氣盛。二曰氣虛。三曰邪寓。

四曰體滯。五曰情溢。六曰直叶。七曰比象。八曰反極。九曰厲妖。何謂氣盛。陰氣盛則夢涉大水而恐懼。陽氣盛則夢大火而燔灼。陰陽俱盛則夢相殺。上盛則夢飛。下盛則夢墜。甚饑則夢取。甚飽則夢予。肝氣盛則夢怒。肺氣盛則夢恐懼。哭泣飛揚。心氣盛則夢喜笑。恐畏。脾氣盛則夢歌樂。身體重不舉。腎氣盛則夢腰脊兩解不屬。短蟲多。則夢聚衆。長蟲多。則夢相擊毀傷。此氣盛之夢。其類可推也。何謂氣虛。肺氣虛則使人夢見白物。見人斬血籍籍。得其時則夢見兵戰。腎氣虛則使人夢見舟船溺人。得其時則夢伏水中。若有畏恐。肝氣虛則夢見菌香生草。得其時則夢伏



樹下不敢起。心氣虛則夢救火陽物。得其時則夢燔灼。脾氣虛則夢飲食不足。得其時則夢築垣蓋屋。此氣虛之夢。其類可推也。何謂邪寓。厥氣客於心則夢見丘山煙火。客於肺則夢飛揚見金鐵之奇物。客於肝則夢山林樹木。客於脾則夢見丘陵大澤。壞屋風雨。客於腎則夢臨淵沒居水中。客於膀胱則夢遊行。客於胃則夢飲食。客於大腸則夢田野。客於小腸則夢聚邑衝衢。客於膽則夢鬪訟自刎。客於陰器則夢接內。客於項則夢斬首。客於脛則夢行走而不能前。及居深地窳苑中。客於股肱則夢禮節起拜。客於胞臚則夢溲便。此淫邪之夢。其類可推也。何謂體滯。口

有含則夢強言而暗。足有絆則夢强行而蹙。首墮枕則夢躋高而墜。臥藉徽繩則夢蛇虺。臥藉彩衣則夢虎豹。髮掛樹枝則夢倒懸。此體滯之夢。其類可推也。何謂情溢。過喜則夢開過怒則夢閉。過恐則夢匿。過憂則夢嗔。過哀則夢救。過忿則夢詈。過驚則夢狂。此情溢之夢。其類可推也。何謂直叶。夢君則見君。夢甲則見甲。夢鹿則得鹿。夢粟則得粟。夢刺客則得刺客。夢受秋駕則受秋駕。此直叶之夢。其類可推也。何謂比象。將蒞官則夢棺。將得錢則夢穢。將貴顯則夢登高。將雨則夢魚。將食則夢呼犬。將遭喪禍則夢衣白。將沐恩寵則夢衣錦。謀為不遂則夢荆棘泥塗。此比



象之夢其類可推也。何謂反極。有親姻燕會。則夢哭泣。有哭泣爭訟口舌。則夢歌舞。寒則夢煖。飢則夢飽。病則夢醫。憂孝則夢赤衣絳袍。慶賁則夢麻苴凶服。此反極之夢。其類可推也。何謂厲妖。強死之鬼。依人爲殃。聚怨之人。鬼將有報。其見之夢寐者。則由已之志慮。疑猜神氣。昏亂然後鬼厲乘其類瑕。肆其怪孽。故禍災立著。福祉難祈也。乃若晉侯受繫於秦伯。燕王貶徙於房州。則又其次矣。此之謂厲妖之夢。其類可推也。凡此九端。感變雖殊。占應則一。或同而異。或異而同。未可據其往規。卽譚凶吉。王符夢列篇備矣。

○昊天篇

論昊天夢兆之旨

昊天羣物之祖。至尊之位。故曰天子者。天帝之子也。昔崔靈運夢蕭道成爲天帝第十九子。而孫奉伯亦夢道成乘龍上天。夫南齊之主。閏餘耳。猶且上應天命。況勳弘混一位。居正統者乎。是故漢文帝夢黃頭郎推已上天。宋神宗夢神人捧已登天。漢光武夢乘赤龍上天。而馮異遂與諸將勸立。趙汝愚夢負白龍升天。而理宗果以素服卽位。此四帝者。漢宋之賢主也。和熹鄧后夢以手捫天。而臨朝策立。有功漢祚。豈比宇文泰之母。夢抱子升天。未至而止。陶弘景之母。夢扶已升天。無後而絕者哉。乃若劉穆之夢合



丹升天。竟登僕射。韓稚圭夢捧天者。再歷相二君。陶侃薛安都夢謁天門。皆秉節鉞之貴。秦穆公趙簡子夢至帝所。咸徵後裔之昌。叔孫穆子夢人助已勝天。終有餓死之奇禍。武士護夢帝騎已上天。卒蒙追冊之偽名。然而晉之小臣。夢負景公登天。而出廁之後。即以為殉。漢之許楊夢上天。為天帝所怒。乃功成善。唐之賀知章夢上天。遍遊帝居。僅得請為道士。嗚呼。吉凶可易占哉。

○日月篇

論夢日月休祥之應

日。月。極。貴。之。徵。也。昔漢武帝之母有神女授日之夢。而宋之太宗真宗仁宗寧宗。其母之娠而育也。蓋莫不夢日云。

或納日於襟懷。或得日於神授。或日墜而承之以手。或日逼而承之以裾。下至僭竊之輩。夷狄之君。如孫權啓吳。劉淵稱漢。拓跋開魏。耶律興遼。咸有夢日之兆。豈非據鎮一方。統馭萬姓。其照蒞之誼。名位之尊。固有日之象也哉。善乎衛靈公有言曰。夢見人君者。夢見日。非竈君可喻也。夢鬪日不勝。而知齊景公之病瘳。夢日繞軍營。而知晉明帝之駕至。陳高祖夢朱衣神人捧日而納其口。唐玄宗夢緋禪兵士負已而出諸井。故魏文帝陳世祖皆夢日墜地。而懷其三分之一者。未能總合寰區之象也。夫日為至陽之精。近之者顯。程立夢捧日以立。而更名曰昱。韓氏夢朝日。



初出而命男曰暘。陶母夢日精在懷。而弘景以僊術揚名。楊母夢日光射身。而煥然以文章致貴。賈隱林夢日墜於首。而職陞糾察。范應鈴夢日照於戶。而官任少卿。楊炎夢登山捧日。而位晉中書。鄭光夢馳車載日。而爵除節度。海陵守夢以身承日。而驟典機密之務。肥如令夢以牛挽日。而終授散騎之銜。茲非近君之驗耶。然毛貞輔夢吞日腹。熱可謂貴兆。而占者僅許為赤烏場官。蓋得推夢之圓機矣。乃若月為衆陰之長。亦太陰之精也。呂錡夢射月。而楚師敗者。周王為日。而楚為月也。漢元后之生。與夫齊婁后之生。女也。皆有懷月之夢。果應妃后之尊。孫策蕭繹其母

皆夢月。而策為吳王。定都江左。繹為梁帝。肇迹湘東。然享國皆不久遠。豈能外其盈虧之數乎。闕澤幼年夢名在月中。范純仁初誕。夢兒投月府。其清輝高舉。傳映後世。宜矣。

○雷雨篇

論雷電雨澤星宿雲霓等象夢應之旨

雷雨星電雲飈火冰晴晦之類。皆天象也。風雷為號令。雨為恩澤。瑞星彩雲。電火為文明。冰泮為婚媾之期。此理微矣。齊之竇母。夢雷電耀目。而泰生。宋之宗母。夢雷電燭身。而生澤。夢雨中戴帽者。未沾一命之榮。夢江上逢雷者。果膺百里之寄。若夫星為元氣之英。豈惟庶民之象。故北斗為尚書之位。而士人夢此。則有魁元之選。長庚星應於李



翰林老人星應於臧諫議黃亢之母夢吞星而亢名顯於  
 宋代黃潛之母夢懷星而潛業著於元朝北齊高歡步履  
 星樞南唐伍喬名符星號由是觀之則知夢星臨身者為  
 吉夢星墜野者非祥火亦陽精飈為噫氣智伯夢火光見  
 於秦楚之邦仲尼夢赤飈起於豐沛之郡化彩雲而成鳳  
 徐陵降誕之禎立堅冰而語人令狐媒合之兆錦虹升天  
 驗李雄之僭號黑風破屋歎夏桀之將亡雲團入口知文  
 譽之將興雲氣暗星測北敵之為禍張鶩夢卿雲覆身而  
 射策第一崔母夢碧雲授函而女為仙其文虔祈晴許  
 份禱雪達奚請雨之夢則精誠感格上下流通亦恆理爾  
 未足訝也。

○山水篇

論山水臺閣城郭廟宇等夢應之旨

山川道路土石皆地之屬王充論衡曰山陵樓臺官位之  
 象也人夢登山陵上樓臺輒得官位信斯言也則峰巒殿  
 閣為貴顯之標江海波濤為財富之藪故劉穆之夢海峰  
 秀而應召李虛中夢泰山裂而大還薛淑夢張亮掛絲在  
 山謝奉夢鄭猷爭錢落水唐玄宗夢遊潛山之井齊世祖  
 夢踐文王之田漢武帝夢登高山隋文帝夢遭洪水宋主  
 夢河中水涸梁君夢田邊水深鄭獬夢遇吏而浴池張敏  
 夢尋友而迷路謝靈運夢茅洞趙相環夢柳河孫贊明夢





浴溫泉。鄧士載夢觀山水。夢持浮磬之精則生今子。夢浣西江之水。則進佳文。夢丘陵頓起。果徵道路之崎嶇。夢中原告平。終驗寰宇之寧謐。夢海濱送塔。而僧言可信。夢東南傾地。而江左難平。然則陶唐氏夢登山乘龍者。豈非尊踐天位之兆。

高皇帝夢流水及足者。又非功銘邊界之符也哉。至於樓臺城郭。厥兆不同。漢明帝夢金人行御殿。唐明王夢諸仙遊月宮。至素夢至玉京。牛益夢至天第。方朝散夢玉華殿。王平甫夢靈芝宮。蔡君謨夢臥譙樓。沈瑞夢書范宅。應鈴之祖。夢雙日照戶。張猛之母。夢襲綬登樓。衛莊公夢至昆

吾臺。齊世祖夢行太極陛。傅游藝夢涉湛露殿。荀伯玉夢上廣陵城。崔元綜夢赴履信坊。下元珍夢謁黃牛廟。若夫石曼卿為芙蓉城主。歐仲純為長白山君。蔣兒為太山伯。趙父為澧州神。玄宗造九天採訪宮。陸洎判九州陽明府。崔宅禱疾於后土。徐精生子為社公。則又夢之怪誕。難於究詰者也。

○形貌篇

論夢形體腹臑毛髮等兆之旨

形貌聲音發於夢兆。至無定也。莊子曰。夢哭泣者。旦而田獵。列子曰。夢歌舞者。哭。長柳經曰。夢吹噓者。欲有求。是哀樂相倚伏。而氣機自旋轉。知此而他可測矣。昔晉侯夢楚





子監其腦。鄭灼夢皇侃唾其口。劉之遴夢為折臂太守。張  
 司直夢為懷孕婦人。楊子雲夢吐五臟。張審通夢增一耳。  
 魏延夢頭上生角。鄭獬夢臂上生鱗。鄭玄夢刀破其心。而  
 尹知章之少年。亦夢鑿破其心。丁固夢松生其腹。而張志  
 和之母氏。亦夢楓生其腹。齊景公夢人黑而短。李林甫夢  
 人皙而髯。馮德明夢易肺肝。王仁裕夢洗腸胃。張后夢神  
 劍決腸。孫母夢吳門繞腸。賈弼之夢人易其頭。司馬懿夢  
 帝枕其膝。王處訥夢剖胸納其巨鑑。武玄照夢滌腹受其  
 靈符。沈約夢斷舌而巫人之言相同。唐主夢斷頭而太子  
 之禪不爽。夢舉體毛生而齊世祖即位。夢舉體火熱而張

敬兒伏誅。夢換鬼眼而陶學士不至尊官。夢變虎頭而李  
 太守即承封誥。夢與鬚者。位登宰相。夢揮鼻者。官至郎中。  
 李廣夢苦心。劉誕夢失髮。周昭王夢摩臆。隋文帝夢獨拳。  
 米元宗夢妻面黑痕。宋羅妻夢佛手如席。宋榮婦夢人流  
 血而避亂。顧琮夢母下體而得生。夢臀黑而知晉侯受命  
 於天神。夢隱毛而知酈範豪盛於齊下。推斯類也。若有神  
 明。握其樞柄。非人力所能轉移者矣。

○飲啖衣履篇

論夢食物衣服兆應之旨

食飲衣服。乃人生之切用。昔何點夢服丸藥一掬而病痊。  
 齊后夢食麻粥兩甌而乳出。韓退之夢吞丹篆一卷。虞仲





翔夢吞周易三爻。張迥夢吞五色雲團。李母夢吞八仙字錄。趙道士夢吞青柏葉。馮侍郎夢吞紺蓮華。劉贊夢吐金龜。邵婦夢擎玉筋。侯弘實夢飲河水。王仁裕夢飲西江。張汝明夢服南星。唐玄宗夢餐藤蕊。夏侯訴夢仙藥可以痊母病。陳宜中夢大黃可以愈天災。江杯夢飲慧眼之泉。丘傑夢噉生菜之毒。謝進士夢吞珠顆。而詩名大播。唐僖宗夢噉棋經而奕旨頓通。然則劉敬宣夢吞土而吉。梁太宗夢吞土而凶。又豈可一端論乎。若夫有夏神禹之初生也。而修己夢吞薏苡。迨我

大明太祖之方娠也。而 陳后夢吞藥丸。此則兩儀純粹

之氣鍾於二代聖母之身。史冊流輝。古今傳映。非凡夢比也。至衣服之夢。亦有可占。索充夢虜脫衣。陳遵夢兒挽袖。漢武帝夢繡衣使者。王相國夢綠衣叩童。李皇后夢羽衣降自牕中。齊世祖夢桑屐行於殿上。劉將軍夢褥席之賜。竇中丞夢股肱之衣。費絢夢衣錦在井而榮歸。拓跋夢脫冠臥地而被害。夢筆畫衣邊者徵南齊帝位之踐。夢日入裙下者兆北齊後主之生。鄧攸夢水旁斲囊而授汝陰太守之符。到溉夢湘東脫帽而膺會稽長史之職。樂彥禎夢帶履舄而行。果有警於軍士。王源叔夢引紫服而進。終有驗於荆公。李固言夢著宰相禮衣。劉審義夢受孝子緋服。



薛母夢錦衣一篋。而生子為祕書監。仙母夢朱衣滿空。而生子為司命君。至於方父夢赤衣跪告。緩期。裴君夢繡衣拜禰謝德。乃蛇雉化形。禍福有報者也。

○器物篇

論器物夢應之旨

器物應夢。昔有明徵。如商湯夢人負鼎。劉沔夢人授燭。陶侃夢司馬與鎧。魏武夢三馬同槽。梁太祖夢對奕。擾道。唐武后夢雙陸不勝。張猛之母。夢佩印綬於樓中。李白之母。夢得棋子於戶外。劉勰夢執丹漆禮器。王茂夢墮鐘磬樂器。錢鞏之夢。以銀杯為琰。張瞻之夢。以石臼為炊。王濬夢懸四刀。徐溥夢授六鑰。劉仁恭夢佛幡出指上。沈慶之夢

鹵簿入厨中。陶母夢香爐降室。徵弘景之登仙。任母夢彩蓋懸鈴。兆彥升之通顯。夢女子携巨篩行空中。驗金陵之漂杵。夢神人昇大秤較天下。知昭容之秉衡。到母夢置鏡在懷。而生男。王子夢納鏡在腹。而明術。元質夢挽弓射狗。而得第。混墳夢載弓入海。而成功。夢儀衛喧迎。而宣宗踐祚。夢絳帳流遶。而尹喜誕生。夢道士持旌節。而李涼公幸於天室。夢僧童持寶幢。而薛中丞卒於臺省。乃若車船之器。應夢亦殊。鄭光之夢車載日月。之夢舟施華蓋。沈嶠夢渡江覆舟。水分兩段。何休夢乘舟渡水。舟判兩頭。謝安夢乘板。溫之輿。杜稜夢討侯景之艦。此舟車之應夢者。



也。舟車之外。有益民用者。孰非器物也哉。惟聖人能制器而尚象。在君子貴藏往而知來。

○財貨篇

論夢珠玉金錢錦帛等兆應之旨

財貨之夢。珠玉錢帛之類是也。夢糞穢木石者。得財帛。夢珠玉錢帛者。多光顯。昔樂史之母。夢珠五色。佛祖之母。夢珠二枚。西施之母。夢珠射身。寇瑊之母。夢珠入口。南齊極氏。夢食玉勝。北齊胡氏。夢坐玉盆。邵康節之母。夢用玉筋。章得象之母。夢獲玉像。宰相張說。夢玉燕而生。郎中李朝。夢玉魚而卒。彥緒。夢婦人取臺鏡。閻涉。夢母子贈金錢。范母。夢金席而生男。晉帝。夢玉盤而享位。梁主。夢曹武借錢。

謝奉。夢鄭猷爭錢。夢司錄。貸錢千萬。而貧儒頓富。夢神人。買錢百萬。而長子驟亡。曹丕。夢磨錢。章與。夢積笏。沈弘先。夢得絹兩疋。而壽算有定。江文通。夢還錦數尺。而文名遽衰。夫財貨之夢。不一。此固其式也。

○筆墨篇

論夢文房寶用詞翰吟咏兆應之旨

筆墨亦器物之類也。然文人才士。賴此以展其情。往蹟奇聞。得是以傳於遠。其為器物雖微。而功用甚大。故特著於篇云。昔吳王。夢筆點額。齊王。夢筆畫衣。舍人李嶠。夢筆二枝。與馬裔孫之夢相同。范質和凝。夢筆五色。與江文通之夢弗異。黃天叟。夢得墨漬之筆於孔子。紀少瑜。夢受青鏤。



之管於陸倕楊奐初誕夢神授筆而光射身旁李白少時  
 夢花生筆而名聞天下王珣夢大筆如椽王勃夢九墨盈  
 袖此皆吉兆也乃若詞賦歌謠之夢則取驗紛然不一是  
 故趙武靈王夢處女之歌司馬相如夢大人之賦令狐熾  
 夢桐稚之語荀伯玉夢草肅之謠蕭貫夢撰曉寒之詞邢  
 郎夢聽陽春之曲許渾夢改飛瓊之句蘇軾夢作迴文之  
 詩狄遵度夢為佳城篇李長吉夢為玉樓記索綏夢題封  
 角杜牧夢書白駒唐寅夢中呂之字而悲壽年王勃夢太  
 極之言而著易理蔡少霞為五雲閣吏而書碑碣山玄卿  
 為紫陽真人而書宮銘王生夢作西施輓歌沈壻夢為秦

女墓刻郭仁表夢道士題紙上官魏夢煬帝借書蘇檢夢  
 妻氏裁牋韋檢夢美姬賡律若夫蟾泣桂香長吉升天之  
 韻蝸鳴槐綻孫樵乞巧之文池生春艸謝公憶弟之章魂  
 過大江閨婦寄夫之作張省躬夢友人賦贈李仲雲夢故  
 弟誦詩又非夢中傳習者哉

○字畫篇

論字畫拆合夢應之旨

字畫屢變後世非蒼頡之舊矣而拆文解夢往往取效如  
 松為十八公槐為木旁鬼垢去土而為后虜脫衣而為男  
 羊無角尾而為王筆點額顛而為主木破天而為未河無  
 水而為可狼啖脚而為却人上山而為凶三刀為州二山



為出片犬為狀失禾為秩車掛肉而為斬箭射狗而為策  
 石逢皮則破人傍木則休笠飄水畔泣字分明火入林中  
 焚形顯見三女有私姦之擾三牛有犇走之憂犇與一木  
 兩火者榮耀之光一水四魚者鰥寡之象人騎牛背失脫  
 人言犬吠獄囚一斗入空門聞爭兩絲纏白木樂事一人  
 立門逃閃兩人夾木必來符融知馮昌殺董豐之婦李公  
 佐知申春殺小娥之夫晉祚將盡預悟昌明之言曾妻于  
 歸方識田日之姓崔湜座下聽法而照鏡李令戴艸入水  
 而持刀柳刺史柴欠七千孟少卿字書九十至於內人為  
 肉火軍為輝絲山成幽昆皆有比角為刀下用汝為水邊  
 女甄為土西瓦聞為門中耳與夫蘇棘丹砂丘八之字並  
 著徵驗豈非數有前定也哉

○科第篇

論夢主甲第魁元加品晉秩之應

科甲爵品莫不有前兆焉昔孫屋夢踐積木之上袁郭夢  
 立北斗之下李迪夢剃髭曾迥夢添耳胥偃夢斬項劉沆  
 夢落頭楊通夢狀元投刺乃稱龍首山人堂吏夢狀元姓  
 劉乃稱火山軍士王黻夢作樂迎狀元至張黼夢登第在  
 狀元前馬希先夢靈槎之題秦少游夢殯柩之葬林榮祖  
 改名溫而鄉闈薦居第一孫貫改名抃而春榜列居第三  
 彭時岳正得魁首皆預夢於外官王鏊錢福為狀頭並應



夢於主考。王文博夢熊誼劉鑄之次第。丁咸序夢龍起駱起之聯名。宋嶽改名言而春魁及第。輒貞改名著而四舉登科。韋詞夢狀頭李固言。樊系夢榜首王正卿。楊敬之夢濮陽之姓。皇甫弘夢石婆之神。宋主策士。夢菜齊殿基。沈晦中魁。夢身跨鵬背。是科甲之顯實。有先徵。況爵品之榮。又非前定者乎。故文彥博入江瀆廟。而巫祝已知顯職。裴玄真過華山祠。而老人報以貴期。張文懿爲相。已預兆於寺僧。呂夷簡當權。亦先徵於濠守。王播夢坐於杜之左。潘玠夢立於趙之東。高襄州。商衡陽。夢有人呼。何僕射。朱少卿。夢聞鬼話。曹確夢爲僧。而杜宰相退位。玄宗夢孝子。而韋見素持衡。張鎰夢任調拜麻。奚陟夢吏書汗墨。徐羨之夢先人告以當貴。劉穆之夢鎮軍忽爾相迎。沈裕可授五品之官。邢陶難得水部之牒。薛長史旬日除招討之職。王小將終身掌將相之權。陳安平東司異遷。李輔國官祿已盡。華母夢其子爲司隸。楊礪夢其主爲天尊。至於陳文帝之夢昭達。宋仁宗之夢馮京。此與高宗之夢傅說。成祖之夢周舟。何以異哉。是皆君臣神會。幾兆不凡。而劉禹錫所謂夢想神明之遊。柳宗元所謂寤寐天顏之近。要非諛詞也已。

○神怪篇

論神鬼怪夢之兆



神怪之譚。聖哲所閱也。易稱睽鬼。詩詠百神。書紀六宗。禮別五祀。是蓋體物之旨。均非欺俗之文。若謂夢魂之有交。豈免謬悠之深議。然緇函青史。或炯炯載焉。何得概以爲虛也。茲條數端。用倒波蔓。亦足以見事有定。而難更。幾有兆而莫匿。詎非君子脩身俟命之監乎。昔唐堯夢白帝遺子。夏禹夢蒼水告書。追我

高皇帝夢天神授衣。成祖夢城隍救駕。此則聖君之夢。關屬世運昌隆。非可神怪論也。若號公夢蓐收。趙嬰夢天使。子玉夢河伯。秦皇夢海神。明帝夢金人丈餘。劉曜夢金人東向。符健夢朱衣。使者授龍驤大帥。杜稜夢朱航池君。

稱征討將軍。趙槩名更於金錄。孫抃名慎於春榜。鄭權名署於滄門。秦彥名變於人呼。張闡名定於神書。曹熙名同於賢諱。謝敷夢山神而得利。習郁夢山神而封侯。許攸夢爲北斗星君。明皇夢得南山進士。楚王夢遇巫山神女。后羿夢逢洛水仙妃。田千秋夢白頭翁。而知訟太子之寃。劉靈哲夢黃衣老。而能愈母氏之病。徐孝嗣夢童子請移床。而免禍。喬執中夢神人來昇職。而遽殂。崔浩夢與鬼爭義。而定曆元。王延壽夢睹鬼變形。而作夢賦。晉帝夢河神求馬。極豁夢山鬼告行。史浦夢神人來自天上。而知陳氏當興。子嬰夢神人至自沙丘。而知天下將亂。趙旭夢青童爲



配弦超夢玉女爲妻。夢羣仙奏樂而傳紫雲之音。夢劉宿守邊而得石洞之像。乃若呂光夢傅曜被殺。范式夢元伯告亡。皇甫謐夢曹爽受誅。陶弘景夢蕭鏗言別。蔡君謨夢張甲病死。楊渥夢徐善遠來。魏高祖夢嵇紹迎謁。盧元明夢王由贈詩。賈餗夢沈傅師報休。虞集夢陳仲興對語。石虎夢宣咸而託其子。張駿夢子瑜而擢其孫。王奉先夢愛子於家庭。陸休符夢友人爲隸卒。諸葛母夢元崇罹禍。緱氏尉夢叔敏告災。唐太祖夢魏徵。杜如晦。唐太宗夢薛收。虞世南。此則遊魂未久。憑夢相通者也。亦有往代之英。遠寓後人之夢。如齊景夢伊尹。極帝夢老聃。吳孫皓夢霍光。

宋高宗夢崔令司馬。括夢鄧艾。呂子明夢義文。李壻夢曰先生。玄宗夢孫思邈。孝武夢漢高祖。黃翻夢孤竹君。此與孔子夢周公。同乎異乎。至於孔子在天之靈。則又劉勰張之純。黃淵。黃澤。鄭玄。譙周。齊季鉉。所嘗夢接者也。高母夢仙語。而名子爲琳。劉父夢奇事。而名子爲樵。高彥夢道士之生。而名子爲禮馬。從政夢妾父致謝。而名子爲涓。趙葵虞集。均叶夢於南衡。倪岳尚書。特有感於北鎮。夢鄧禹而生。范祖禹。夢李白而生。郭祥正。夢謝靈運而生。邊鎬。夢牛僧孺。而生。劉沆。夢戒禪師而生。蘇軾。夢許真君而生。宋庠。若夫維嶽降神之雅詩。蓋亦玄宰生人之妙道。故榮王夢。



金帽神人入室而生理宗阿蘭夢金色神人趨榻而產六  
 祖尹氏夢老翁賜男而名子為瑞劉述夢神馬載兒而名  
 子為朝茲惟載之簡編猶未足為奇異惟楊億始生而體  
 有鶴蛻薛瑄初誕而肌若水晶則今昔所鮮聞也豈輪迴  
 邪說也哉

○壽命篇

論壽算修促棺槨幽宮夢應之旨

壽命短長智者不惑然光陰迅速則聞道脩德之學聖賢  
 所汲汲敏求者也昔文王之母夢生子壽而昌宇文之母  
 夢生子壽而貴武王九十三而終乃文考與以三歲龔母  
 八十二而卒乃厥孫所得五年楊大年數至四十七而告

殂劉弘敬壽增二十五而無恙李適至夢論大衍全數而  
 壽止四十九褚彥回夢差筮著一策而壽止四十八沈慶  
 之夢絹二疋劉之亨夢鯉二頭王董占夢棘而知為妖徵  
 趙直占夢桑而決其壽數竇老夢延三紀徐溥夢有兩千  
 查道夢積善而增齡鄭玄夢歲辰而合讖顏畿齒數未終  
 而復生之夢有驗慕容法年算將盡而禪位之夢可推宋  
 穎夢亡婦來辭李妻夢夫君泣別婁公夢祿命之籍呂湮  
 夢地府之官柏折夢太守相迎王瞻夢吏人奉召此則天  
 命不移人生前定者也若夫棺槨塚墓乃送死厚終之制  
 而形諸夢寐者亦有吉凶之殊焉是故趙良器夢棺十一



夢林玄角 卷之二 三  
而貴列中書。高達夫夢棺寬大而秩改詹事。夢一棺至堂中而李公入相。夢二棺落天上而索充再遷。陽休之夢登塚板柱而進位封公。朱照鄰夢造棺弗成而應舉下第。周堅伯夢講道坐陰堂。歎其壽盡。李元忠夢執燈入父墓。兆在光前。至於溫序李德裕之死也。皆託夢而得歸葬。豈非精爽之未嘗泯滅者哉。

○鳳鳥篇

論禽鳥夢應之旨

鳳。凰。靈。鳥。也。德。茂。丹。穴。道。光。於。庭。蓋。與。麟。龍。並。稱。矣。自。鳳。而。降。總。屬。凡。鳥。而。叶。夢。則。有。辨。焉。周。宣。夢。書。曰。雞。為。武。吏。有。冠。距。也。夢。見。雄。雞。則。憂。武。吏。若。然。則。鶴。鳧。為。仙。鳥。鷹。隼。為。義。鳥。烏。為。孝。鳥。雉。為。介。鳥。孔。雀。為。文。鳥。鴻。雁。為。賓。鳥。鵲。為。喜。鳥。睢。鳩。鵲。鴿。為。有。別。有。序。之。鳥。鴟。鵂。為。妖。鳥。不。可。類。推。乎。是。故。夢。鳳。下。溪。澤。而。齊。世。祖。位。禪。宋。朝。夢。鳳。止。家。庭。而。段。少。連。官。居。學。士。夢。鳳。集。其。身。而。娠。王。遠。知。也。寶。誌。識。其。為。神。仙。宗。伯。夢。鳳。集。左。肩。而。生。徐。孝。膠。也。寶。誌。歎。其。為。天。上。麒。麟。夢。吐。白。鳳。而。楊。雄。甘。泉。之。賦。成。夢。接。赤。鳥。而。劉。漢。太。公。之。祥。顯。夢。紫。鳥。下。降。而。命。名。為。鸞。夢。大。鳥。高。飛。而。改。名。為。翀。夢。彩。鳥。入。口。而。羅。含。擅。文。藻。之。佳。聲。夢。雙。鳳。集。拳。而。孫。氏。遭。削。桐。之。凶。訊。夢。吞。金。雞。而。產。興。宗。是。為。遼。主。之。兆。夢。懷。玉。燕。而。孕。張。說。是。為。宰。相。之。徵。夢。羣。鶴。而。張。氏。



生九齡。夢翠雞而施氏生四子。夢雁鶴來迎而康節之數盡。夢雌鶴飛去而永叔之女亡。夢折鸚鵡之翼而廬陵王因以召還。夢駕仙鶴以遊而李抱真終於不悟。夢身跨鵬鳥而沈晦得大魁之兆。夢身為蝴蝶而莊周識物化之原。夢雀銜丹書而文王起為西伯。夢鳥銜長傘而徐子果以惡終。夢孔雀羽為袞服。此南齊之所以興。夢金翅鳥食小龍。此南齊之所以弱也。

○獸羣篇

論獸屬夢應之旨

獸羣以麟為瑞。昔孔子夢芻兒捶麟。得麟書三卷。其後西狩獲麟。遂作麟經。云熊為伯鯨之神。又為晉卿之祖。故晉

平公夢黃熊入寢門。起簡子。夢射熊在帝所。此左遷之言。可考也。而符健之母夢大熊據戶。雷機之父夢黑熊行天。非小雅所謂男子之祥乎。虎稟秋殺之氣。山獸之長。暴虐不祥之兆也。故胡亥夢虎嚙左驂。曹爽夢虎銜雷公。倪盜因夢白虎而生。令周因夢乳虎而病。獅為毛羣之特象。本搖光之精。故王敬則夢騎獅子而位至太尉。張成遜夢得大象而官居郡守。至於佛祖之生。則應白象之夢焉。馬牛二畜。取象乾坤。而占夢者或以馬為火。而卦屬離宮。牛為陰。而類同廟鬼。故黃平夢舍中馬舞而火作。唐武夢空中馬飛而事成。童豐夢乘馬停水而喪妻。劉述夢神馬載兒。



而得子。李伯麟夢洗馬。張文成夢乘驢。蔣琬夢牛頭流血而進公位。周繕夢牛尾垂雙而失貨財。陳邑宰夢道聽牛言。張丞相夢誤斷牛訟。若夫坎豕良狗兌羊亦皆家畜而夢兆有同。漢景帝夢降赤彘。安祿山夢化黑猪。燕相夢豕變龜。關羽夢猪嚙足。裴子夢射狗而得第。王敦夢犬噬而喪軀。李令夢母猪極大。而得為屯主。許超夢盜羊入獄。而得封城陽。吳夫差夢黑犬走號。而滅於句踐。張天錫夢綠犬偏咋。而敗於符堅。吳近夢白羊。而賢后產於未年。高宗夢白羊。而孝子生於未月。黃帝夢驅羊萬羣。而得乎力牧。李公夢食羊萬數。而驗於異僧。乃若狼稟金精。以狗為舅。

鹿。涵斗曜。以羊為友。故張鉞夢與蒼衣人會讎。晉婦夢與黃褐人相淫。此狼之為妖也。史思明夢鹿死水涸。而命盡須臾。吉士瞻夢鹿韓成堆。而祿遷十一。此鹿之為兆也。凡為羣獸者。可不觸類而占也哉。

○龍蛇篇

論蛟龍蛇虺夢應之旨

龍蛇之夢。載於傳記。可據而譚也。有夢龍而應降誕之祥者。如漢薄昭夢蒼龍據腹而生代王。晉李后夢兩龍枕膝而生孝武。濮王夢龍墮衣上而生英宗。黃妃夢龍納懷中而生度宗。豐公之妻夢鳥如龍而生太公。魏武之后夢日化龍而生文帝。非齊婁后有四龍之夢。南齊陳后有小龍



之夢是也。有夢龍而應尊貴之兆者。如後漢光武夢赤龍上天。南齊太祖夢乘青龍逐日。劉穆之夢船挾白龍而受宋武之召。趙汝愚夢背負白龍而為理宗之臣。荀伯玉夢齊帝六龍出腋。滕雋夢吳程赤龍化形。南唐義祖夢祖身取龍而得烈祖。烈祖夢殿檻繞龍而得元宗是也。至於黃帝氏夢龍授白圖。王積薪夢龍吐棋經。蓋靈妙之理造化所洩也。西京雜記謂董仲舒夢蛟龍入懷而作春秋繁露。不有繇哉。亦有夢龍而非祥者。如郭禹將終。則夢龍止於屋。孫休陶母夢乘龍無尾。果著絕後之徵。然吳澄之生。鄰媪夢蜿蜒之物降於池中。龍乎蛇乎。未可知也。夫蛇亦龍類。厥兆不同。故秦文公夢黃蛇。亘天。晉文公夢大蛇當道。劉禎夢蛇生足。隋侯夢蛇報珠。唐琮夢蛇繞身而作草書。范延光夢蛇入腹而蓄異志。西蜀李雄之生。大蛇見夢於母氏。南齊遙光之敗。羣蛇見夢於城人。然謂虺蛇為女子之祥。豈盡然哉。

○龜魚篇

論魚鼈昆蟲之夢

龜魚蠅蟻之屬。莫不稟氣於陰陽。存形於水土。故抱朴子曰。雞有搏棲之雄。雉有擅澤之矯。蟻有兼弱之智。蜂有攻寡之計。又曰。周和壬南征。一軍盡化。君子為猿鶴。小人為蟲沙。豈非各從其類哉。昔宋軍夢神龜出使於河伯。高虜



夢神龜隕命於秦庭。劉贊夢金龜而進文才。梅老夢黃龜而生男子。燕相有夜光之報。韓愈作玄夫之詩。萬畢得名龜而夢送水中。淳于棼見腐龜而夢獵上山。然稽諸易象。龜屬離而魚屬巽。其見於夢。豈特詩人衆魚之夢。應豐年而已哉。漢武夢魚求去鉤而獲珠。胡妻夢魚躍水盆而生姪。太守劉之亨夢魚乞命。與邑宰阿失里夢魚禁捕者無異也。而一則延算。一則溺民。則悟不悟之殊。爾乃若昆蟲之屬。厥類寔繁。青蠅止樊。詩人所刺。故昌邑王賀夢蠅矢積階。吏部何晏夢蠅頭聚鼻。皆有讒兆焉。蛆蟲則依附而不散。衆庶之象也。故馬后夢飛蟲入膚。唐祖夢羣蛆入體。皆有貴徵焉。至於蟻本螫蟲。亦居王號。奉檄南柯。爲郡守而大治。浮蘆江上。能穴獄而報恩。此或文士寓言。要亦夢境所有也。

○草木篇

論夢艸木花卉果實應兆之旨

草木入夢。各以類應。劉向曰。心應棗。肝應榆。周宣夢書曰。松爲人君。夢見松者。見人君也。又曰。榆爲人君之德。至仁也。夢採榆葉。受恩賜也。夢居榆樹。得官貴也。又曰。楊爲使者。夢持楊奉使命也。又曰。禾稼爲田財之所出。夢見禾稼。言財氣生。夫周宣善占夢。其書雖不見其全。茲亦可窺其概。云昔太姒夢商棘。周梓而國家興亡。卽此乎判矣。丁固



夢松而為貴兆。張宅夢栢而作凶徵。夢楓生腹志和名動。楓宸夢柳仆地宗元職居柳牧。夢大魚食蒲知符生之將廢。夢滿江長艾驗蕭帝之將昌。李夫人夢木瓜二株。劉巢林夢石榴兩樹。紹宗夢蒜申母夢芝。明皇夢藤花。吳近夢芍藥。劉浩夢籬下粟。蔡茂夢殿上禾。劉靈哲夢竹筍而母病可痊。張之純夢嘉果而賢嗣遂誕。爾朱兆興兵夢盡拔馬蘭之艸。劉昌言下第夢飛入刺桐之花。陰貴人夢食瓜甚美而種自蓬萊。宋孝子夢得瓜奉母而事傳魏國符堅。夢萊城而難乎為將。王戎夢桑椹而相繼遭喪。何生夢桐木為像而鄰產最良。張尋夢竹節生庭而暴貴不久。雖云植物之無情亦見夢占之有驗也。

○施報篇

論善惡殃祥報應見夢之旨

施報。幽明之常理也。善惡既積慶殃有餘。形聲所存。影響不貳。故普曠惠於宵冥者必蒙顯佑。加慘毒於無罪者自受陰誅。昔魏顥嫁父妾而老人結艸於道衢。李珣濟貧人而仙府書名於石壁。陳妻酹古塚以茶而獲貫鈔十萬。周婢拔鬮體之刺而得金環一雙。豈覬利於沙漠迂談以惑俗者哉。乃若趙氏之冤搏膺請帝。良夫之酷被髮叫天。姚萇害符堅而率鬼相攻。陶繼斬樂伎而訴天得理。漢靈帝殺宋后而上天震怒。宋廢帝殺宮女而佞倖肆殃。高昂殺



奴京兆而膏血淋漓陳悅殺賀拔岳而精神恍惚徐溫發  
 朱瑾之尸因得病而改葬張湊收杲卿之髮因見夢而立  
 祠彭妻嗜殺而死於不義之奴胡篤誣夫而亡於不育之  
 孕商仲堪葬水漂之槨鄒潤父埋西土之尸周簿喪於土  
 囊而二盜莫匿劉昌瘞其枯骨而衆鬼謝恩城陽王報祖  
 仁之讎周文王許君禮之葬如斯類者蓋未暇縷計也至  
 於昆蟲之渺微亦皆稟命於洪造如董君渡蟻方父焚一  
 劉之亨放魚裴安祖活雉老僧哺鴿李令瘞羊金仙呪蛛  
 極邈救鴨厥有感報祥吉可徵而况於人鬼屈伸之間精  
 魂變化之際乎故曰天網不漏人心難欺陽明盛者神啓  
 其衷陰濁多者鬼瞰其尸形諸夢寐不有靈驗哉

○圓機篇

論占夢貴乎簡要之旨

泛喻不如切思博評不如約說夢寐所兆事涉微茫非約  
 說而切思將移神而蕩志故衛玠昧於夢想者寡切思之  
 功而樂廣善於剖析者獲約說之旨也莊子曰方其夢也  
 不知其夢也覺而後知其夢也此語夫夢覺者也而非所  
 以語夫夢夢覺覺者也知夢夢而覺覺則達於死生之故  
 明於終始之端夢亦覺也覺亦夢也夢亦覺也者如莊子  
 夢爲蝴蝶梁世子夢魚鳥者也覺亦夢也者如太史芻狗  
 之夢周宣芻狗之占是也若夫盧少年受邯鄲之枕功成



夢。壽終而黃梁未熟。楊國忠得龜茲之枕。通仙渡海而玄境可遊。則是宇宙一枕也。進退榮枯。枕竅出入者也。王起所謂夢裏羸輪。豈不誠然乎哉。嗟夫。夢之成也。又非可以一竅求矣。靈樞經曰。淫邪襲內。必發於夢。則瀉其有餘。補其不定。而夢可已也。內經曰。少陰之厥。令人妄夢。鍼刺違時。令人善夢。則合之五診而脉可知也。至於鯉湖仙廟祈夢有徵。蓋川嶽之靈。知人休咎。故託夢而洩其幾。朕爾而融高之草。可以占夢。豈非著莢之類。通於人心者乎。然元魏詔誅沙門。以明帝金人之夢。出於虛妄。此固闢邪之確論。要非占夢之圓機。不然。則周之盛時。文治大興。何以得古

夢而拜受。金之世祖。華言未諳。何以卜夢寐而與師也。耶。自衛國嬖人讒逐太叔。而占夢之術始不可憑。自安虜立祠。援夢以欺帝。楊妻生子。引夢以欺夫。而夢始不可占矣。悲乎。豈夢之不效哉。吾之述逸旨也。其夢乎。其覺乎。吾不自覺也。是亦夢也矣。後之君子。試覽逸旨而耳吾曩夢。

逸旨一書。出自陳公手撰。其論夢占之旨。詳委明切。

幾無贖意矣。顧念尚古以來。聖賢明哲。所著經史百家之籍。其中載紀。有關夢占者。非止一說。爰用條列。

卷。以便博洽之士。遡厥源流云爾。

